

Mas cu 40 mil florin gasta na Merca pa trato cu por a ser haci na Aruba:

Escandalo grandi na Aruba den Salubridad Publico

ORANJESTAD(AAN) Si-
mannan cu a pasa tabata tin
hopi critica riba e ministro di
Salubridad Publico, caminda
na un forma tendencioso e
ministro a ser tilda di ta fa-
vorese cierto companianan
den exterior den caso di
pacientnan cu mester a haya
cuido medico na Merca.

Diabierna ultimo ministro
Beke a duna un conferencia di
prensa pa asina aclarea un ke-
tro di criticanan cu a ser
lanza sin base.

Di otro banda DIARIO ta
hayando informacionnan su-
mamente bergonsoso en-
cuanto viahenan cu cierto
pacientnan di Aruba a haci pa
Merca y cual viahenan a costa
un dineral siendo cu esakinan
tabata innecesario.

Tin informacionnan ta cir-
culando encuanto viahenan
cu cierto pacientnan a haci cu
air ambulans y cu a costa
pueblo miles y miles di florin
y tur esaki contra reglanan
vigente di gobierno mes.

No por bay divulga number
di pacientnan y nan familiar-
nan cu a viaha innecesaria-
mente pa Merca, pero si por
bay cuestiona fuertemente

loke a pasa pasobra ta un gas-
tamento di placa sin fin tabata
tuma lugar siendo cu na
Aruba hopi pacient no por
haya un bon trato medico pa-
sobra gobierno ta bisa cu no
tin placa.

Tabata tin segun informa-
cionnan cu DIARIO a logra di
haya ultimo simannan, por lo
menos tres caso cu pacient-
nan a ser manda pa Merca
(Houston) cu air ambulans cu
a costa na viahe so 15 mil
dollar, pa pacientnan haya un
tratamento cu ta uno rutinario
na Aruba.

Algun pacient a ser manda
Merca door di gobierno di
Aruba pa nan bay cambia un
bateria di aparato di curason,
siendo cu e cambio aki ta ser
haci na Aruba pa hopi aña
caba y e trato medico aki no
ta nada di urgencia grandi cu
e pacient mester bay Merca
cu air ambulans.

Ora cu DIARIO a sigui
investiga e caso y a bay
averigua ta di con cierto
pacientnan a ser manda pa
Merca cu air ambulans, a bin

resulta cu e comision cu me-
ster evalua y duna conseho na
gobierno pa cu tipo di trato-
nan asina den exterior, no a
duna ningun conseho posi-
tivo pa cu tipo di viahenan
asina.

Te hasta tabata asina cu un
specialista di Houston lo a
manda gobierno di Aruba y
den e caso aki ministro Lili
Beke, un carta den cual e spe-
cialista Mericano ta puntra ta
di con a manda un pacient te
Houston pa tuma un trato
medico cu facilmente y na un
forma profesional por a ser
haci na Aruba.

Tin pacient cu a ser poni riba
avion di air ambulans pa
Houston y ora cu nan a yega
Merca docternan no tabata na
altura mes cu e pacient tabata
biniendo di Aruba.

Despues ta bin resulta cu
mayoria di e casonan aki a ser
apropa door di Consejo di
Ministro durante cu Ministro
Lili Beke no tabata na Aruba.

Cu otro palabra ministronan
cu no tabata tin nada di haber
cu salubridad publico a bay

mete riba un tereno cu no ta
di nan y riba dje nan a bay
contra tur regla y conseho di
e comision special cu tin pa
evalua tipo di casonan asina.

Mirando cu ta trata di
pacientnan lo ta dificil pa
ministro Beke bay duna
cuenta te den detaye di cada
caso cu a tuma lugar contra
regla, pero durante dianan
venidero ministro Beke me-
ster duna cuenta si di e gaston-
nan cu a ser haci contra tur
regla y norma y tur esaki sin
cu e ministro mes tabata na
altura.

Placa a ser benta afor pa
asina complace algun hende
na Aruba mientras cu keto
bay tin pacientnan na Aruba
cu for di aña pasa september
a haci cierto examennan med-
ico cu mester a bay Curacao,
pero te awe nan no por haya
resultado pasobra gobierno di
Aruba no tin placa pa paga.

Ta un berguenza grandi cu
di un banda ministro di finan-
zas no ta suministra placa pa
salubridad publico pasobra
no tin cent, pero di otro banda

conseho di ministro durante
ausencia di ministro Beke y
contra reglanan di comision
di docternan ta laga pacien-
tann bay cu air ambulans
Merca pa un trato cu por a ser
haci na Aruba mes.

Ora cu bay averigua ken
tabata esnan cu a ser manda
pa Merca ta bin sali afor cu ta
compinchanan politico so a
haya tipo di trato asina?

Riba dje ta bin e parti mas
tristo ainda, esta cu aparente-
mente esnan cu a haya e OK
di conseho di ministro pa
viaha cu air ambulans pa
Merca, no mester paga ni un
cent pasobra conseho di min-
istro lo a dicidi cu pais Aruba
ta carga e gastonan

Ministro Beke mester duna
cuenta e siman aki mes y saca
cifranan di gastonan cu a ser
haci innecesariamente y e
comision cu ta evalua cada
caso pa cu tratamiento medico
den exterior, tambe mester
bay duna cuenta pasobra e
asunto aki no a caba y tin un
rabo basta largo ainda pa
sigui.

Seaport tin plannan grandi pa Aruba

ORANJESTAD (AAN): e
Seaport Conference Center,
construi na 1996, no tabata e
ultimo proyecto. Den e plan-
nan di sr. Eduardo de Veer, cu
nos a tende tocante esaki. E ta
planea pa inverti un 9 miyon
dollar adicional cu e priori-
dad pa cu un marina cual lo
comoda un 100 yate. Mas di
dos miyon dollar lo ser inverti
den e Stardust Showroom
cual lo acomoda e show "Hot
Ticket". Un apertura suave ta
geschecel pa Februari 20,
1998.

E showroom lo tin e capaci-
dad pa 460 persona den e es-
tilo di teatro. "Hot Ticket" lo
ta un show similar pa esnan di
Las Vegas y esun for di Jane
Ryan Productions. "Esaki
sigur lo ta e mihor show ariba
nos isla" segun sr. De Veer.
Tambe un miyon dollar lo ser
inverti pa reconstrui e casino.

DEMOCRATIA FINANCIERO!!!

